

هي : ياريتك زى أبويا.. ياريتك زى جوزى .. ياريت عندى
دوا زى الى أنت بتاخده .. دوا يشفينى ! .. دوا يريحنى .. دوا..

أنا : الله .. يريحك من إيه ..؟ أنت طلعت فيها قوى .. إيه ..
عاوز أعرف ناقصك إيه ؟ عاوز أعرف أنت بقى لك كام يوم
بتكررى النعمة دى .. إيه الى حصل .. حاجات غريبة ملاحظها
وساكت وأقول ياواد اسكت .. مفيش داعى لسوء الظن ..

هي : عاوز تعرف إيه الى ناقصنى .. ؟

أنا : طبعا ..

هي : ليه .. عاوز تعرف ؟ اشمعنى النهاردة ؟

أنا : كل يوم مش النهارده بس .. مش جوزك ؟ مش حبيبك
أنت بتغمضى عينيك .. مش عاوزة تشوفى شكلى وأنا باقول
كده .. ؟ عاوزة تحلمى بواحد تانى .. أنت طبعا عاوزة تسدى
ودانك .. لكن أبدا .. أنا حافضل أقول لك الكلام الى زى
السم ده .. حيعمل فيك إيه السم ؟ ولا حاجة .. لسه شباب .. والله
أنا كنت مغفل ..

هي : على كل حال مش بس أنت الى مغفل .. تحب بقى أقول
لك إيه الى ناقصنى ! .. ؟ مش حقتقدر عليه .. لكن مش
حاجبى عليك .. استن .. اخرج بره جتك داهية ..